

Mana betul! Mufti Johor dalam fatwanya yang tersiar dalam warta Jabatan Agama Johor bilangan 28 ada menyatakan bahawa fatwanya tidak menyentuh zat majalah Qalam atau yang empunya – bagus tetapi dalam bilangan 27 ia cakap daripada tajuk “Hak dan Kebebasan Perempuan” harus membawa fikiran yang serupa dengan fikiran Qadyani dan lain-lainnya – adakah sudah pukul mahu putar lagi. Sudah putar begitu panjang kepada soal orang?

-----\*-----\*

Dalam bilangan 28, mufti itu dalam fatwanya ada sebut orang “tidak segan bergesel peha, bertemu dada berpaut-pautan, bertemu nafas, bertemu pandangan di dalam majlis tarian.....” – syabas masalah akhbar telah lari ke sana. Kita mau satu sahaja di mana mufti tahu fasal itu? Pasang kakikah!

T.S.T.

-----\*-----\*

Ulama utara Malaya

dalam Melayu Raya telah bidas seorang Islam Singapura dengan mengatakan bahawa orang itu tahu cacat sahaja. IMP dicacatnya, UMNO dicelanya dan Parti Islam yang digalak-galakkannya pun dicacatnya juga. Ulama itu nampaknya seakan-akan mengigau kerana adakah dasar kebangsaan IMP itu dihalalkan oleh Islam?

Adakah UMNO itu pembela Islam? Tidakkah ulama itu nampak sandiwara, baju beragam, tikam-tikam (judi) digalakkan oleh mereka? Tidakkah Persatuan Islam se-Malaya telah melanggar pertunjuk Tuhan yang menyatakan bahawa Tuhan tidak menjadikan dua hati kepada seorang manusia?

Apa kata ulama yang berkata: “Saya masih sayang kepada UMNO” sedang ia sendiri sekarang menjalankan Persatuan Islam se-Malaya? Adakah ia pejam mata di dalam kejadian-kejadian yang dilakukan oleh orang yang di dalam lingkungannya? Adakah mereka itu akan redha bersubahat? Insaflah bahawa pekerjaan yang berdua hati itu tidak akan jaya. Kita harap



## KOPI PAHIT

ulama utara faham dan terbuka matanya.

-----\*-----\*

Setiausaha Persatuan Islam se-Malaya dikatakan ada berkata bahawa perjuangan Persatuan Islam se-Malaya adalah bekerja akan menyatukan umat dan mengikut pengajaran Al-Quran dan Al-Hadis. Akuan ini kita berani berkata dusta – Apa sebab? Jawab – Tuhan sudah bilang tidak ada dua hati kepada seorang manusia sedang Persatuan Islam se-Malaya ada dua hati.

-----\*-----\*

Semua orang heboh dengan Timbalan Pesuruhjaya Tinggi Persekutuan Tanah Melayu dengan harapan mula-mulanya seorang Melayu diminta tetapi tak jaya. Kemudian Tengku Abdul Rahman tuntut supaya orang-orang Asiatic memegang jawatan itu – Onn sokong. Tetapi tatkala mengundi Onn tinggal diam.

Apakah fasal- dia sendiri  
tentu tahu dan kesudahannya  
seorang putih dari luar  
diletakkan memegang jawatan itu  
dan sudahpun sampai di Malaya.

Fasalnya sudah tentu terang  
sebagai siang – tak payah ditanya lagi al-maklumlah!

-----\*-----\*

Filem “Nabi Daud” ramai dibangkang orang tetapi ia jalan terus – terus dan terus. Bantahan tidak memapan. Apa orang Islam boleh buat? Jawabnya gigit jari. Yang ganjilnya ada pula orang-orang yang tidak penuh berperasaan agama bahawa yang demikian itu tidak menghina – Lahaula wala quwatta illa billah. Persatuan Islam se-Malaya pun senyap- Mengapa T.S.T. –

Yang di-Pertua sudah jawab. Semuanya boleh berlaku lain tidak kerana kita tidak bersatu dan kerana kita tidak berani berkata benar – Tidak berani mendirikan barang yang hak. Beginilah nasib kita nampaknya tenaga kita dihajat. Kita digalakkan bekerjasama tetapi bantahan kita bak seperti menuang air di daun keladi.

-Cemeti Al-Farouk.